


Dokument as PDF spiekern

En PDF-Datei, dat weet Se wiss, is en Aart Datei, de överall liek utsüht, un twoors jüst so, as se druckt warrt. Düsse Aart Dateien brukt een, wenn een wat mit Word maakt un dat drucken laten will – etwa Flegblätter, Inladungen, Formulare, Faltblätter orr sowat. Druckerien wüllt en PDF mailt kriegen, keen Word-Datei.

Fröher weer dat denn ja jümmers so'n Drama, wenn een maal wat ut Word rut as PDF spiekern wull. Dor geev dat extra Druckerdrivers, de een installeern kunn, dat een denn över den Drucken-Dialog en PDF tostann bringen kunn. Orr een installeer sik to'n PDF-Maker-Programm, dat denn noch en Menü in de Word-Menüliest dä. Allens en Zirkus!

De Tieden sünd endlich vörbi. Nu is dat ganz komodig woorn:

- Gaht Se na **Datei | Speichern unter**.
- Stellt Se in de Liste **Dateityp** (nerrn in't Finster) einfach **PDF** in.



- Dateinaam un Spiekerort stellt Se in, as Se dat kennt.
- **Speichern**.

De Word-Datei blifft natüürlich bestahn, so, as se is. De passeert gor nix.

Nich vergeten, de PDF-Datei achterna in den Ordner antoklicken un apen to maken! Se mööt kunnerlern, wat dat ok allens so utsüht, as dat schall.


Schriftaarden inbetten

Wat avers, wenn dat denn in en Druckerie gahn schall? Denn is tovöör noch een Schridd nödig: Se mööt de Schriftaarden inbinnen. Wenn Se en exotische Schrift bruukt, kann dat sünst


passeern, dat de Druckerie de dör en anner Schrift ersett, de mehr begäng is un ganz anners utsehn kann – dat is denn en deegt Mallöör.

Un woans geiht dat mit dat Inbinnen orr Inbetten vun de Schriften? So:

- In den **Speichern-unter**-Dialog stellt Se toerst den Dateityp PDF in, as wi dat baven beschreven hebbt.
- Denn is nerrn in den Dialog de Knoop **Optionen...** to sehn. Klickt Se den an.




- Nu kümmt de Dialog **Optionen** vörtüüg. Se köönt hier düt un dat instelln, t.B. wenn Se bloots enkele Sieden as PDF rutspeikern wüllt.



- Wichtig för uns is nerrn de Afsnitt **PDF-Optionen**. Dor sitt standardmäßig en Hoken bi **Text als Bitmap speichern, ...** Düsse Opschoon binnt nich de ganze Schriftart in!

- Sett Se den Hoken bi **ISO 19005-1-kompatibel (PDF/A)**. Düsse Opschoon binnt de Schrift in!



- **OK, Speichern.**

Wenn Se dat kunnerleern wüllt, doppelklickt Se einfach mal de PDF-Datei, de Se dor spiekert hebt. Normaal geiht denn de Adobe Reader op, en Gratisprogramm, dat PDF-Dateien wiesen kann. (Word sülvten kann dat ja nich.) Se seht Ehr Datei, avers as PDF.

- In den Adobe Reader gaht Se op Menü **Datei | Eigenschaften...**
- Dor seht Se en groten Dialog.
- Klickt Se op de Registerkoort **Schriften**.

Dor seht Se nu de ganze Liste vun Schriften, de Se in dat Dokment bruukt hebt, un dorblangen steiht jümmers „(Eingebettete Untergruppe)“. So is dat richtig för en Druckerie!

